

三十六經啟請科儀

鳴鼓請聖

鳴法鼓二十四通 叩齒吸生氣 化衣化冠
存本身 化一枯木 借麻離宮之火 焚化煙
內結一雞子 忽現天師像 化身畢 提綱云
太極分初後 三清道在先 誰將玄妙測 金
口與流傳

太上皈命禮玄元闡教天尊（三稱三拜）

開景迎聖

竊以清靜自然之道 本諸無為太虛寥廓之鄉

烏能有相 恍恍惚惚難測諦詮 杳杳冥冥
罔窺蘊奧 倘玄關弗開於俄頃 而天機胡見
其絲毫 八卦霓裳 包羅大千世界 一粒黍
米 渾含不二法門 三景不明 萬象俱渺

太上皈命禮開明三景天尊（三稱三拜）

演法拜聖

所謂道 氣聚陰陽判 天開日月明 三清揚
大道 萬彙荷生成 道場眾等 同聲讚詠
太極圖中大道全 上清真境具先天 三塗五
苦免煩惱 十極群仙悟諦詮 六賊驅除消俗

慮 部曹接引遇奇緣 尊居金闕高無際 經
演遺流億萬年

太上皈命禮流演聖教天尊 （三稱三拜）

讚偈

三清德相 難盡讚揚 臣聞 五方五帝之氣
胥本太極而生 三清三境之真 皆由元始所
化 道高無際 德大難名 巍巍金闕之尊
渺渺玉京之聖 洋洋乎神機罔測 蕩蕩乎妙
用難窺 氣則不偏 精為甚固 入水不溺
入火不焚 第以四隅 亦稟天地之靈 十方
皆具陰陽之氣 邪意起 則正法壞 客念滅
則大道伸 五蘊未空 終歸魔障 六根不去
仍墮孽緣

太上皈命禮降魔護道天尊 （三稱三拜）

啟詞

伏念 萬聖千真 悉居金樓玉殿之上 敢迓
蓬門華戶之中 倘不清靜壇場 恐難迎接仙
侶 特請焰魔羅王朱將軍 風輪盪鬼周元帥
江河淮海四瀆龍王 雷霆一府二院三司 五
雷官軍將吏 諸大靈官 土地功曹 四值使

者 里域真官等神 滌除諸般厭穢 鑒今蕩
穢功德

淨天地神咒

天地自然 穢氣消散 洞中玄虛 晃朗太玄
八方威神 使我自然 靈寶符命 普告九天
乾羅答那 洞罡太玄 斬妖縛邪 度眾萬千
中山神咒 元始玉文 持誦一過 卻鬼延年
按行五嶽 八海知聞 魔王束首 侍衛我軒
凶穢消散 道氣常存 急急如律令
（書令於水鉢內遍洒壇中）

華池五龍水 灑灑淨壇庭 一切諸厭穢 普
悉化微塵

太上皈命禮常清常淨天尊（三稱三拜）

琳琅振響 十方肅清 河海靜默 山嶽吞雲
威靈振伏 招集群仙 天無氛穢 地絕妖塵
冥慧洞清 大量玄玄也（步虛三禮）

無上三天 玄元始三氣。（掐巳午未）三
（掐離）五（掐坎）功曹。（掐辰戌）左
（掐辰）右香官使者。左右龍君。（掐震）
虎君。（掐兌）侍香金童。（掐乾）傳言散

花玉女。(掐坤)令臣身中三十六人出。(掐
本命)出者莊嚴 令臣所奏 咸錫如言 今
為奉(聖宣口意道)恭焚爐內心香 遙望

天階 敬伸啟請 (具職)誠惶誠恐 稽首頓首

虔誠上啟

三清應化天尊
金闕玉皇天尊
十方無極天尊
三清護法天尊
四府眾聖天尊

經筵有感真仙 恭望

洪慈主盟修奉

祝香神咒

心香一瓣 普遍十方 清煙繚繞透蒼穹
功德大無疆 瑞靄壇場 眾聖降金光

太上皈命禮香雲結篆天尊 (三稱三拜)

祝燭咒

蠟炬燦爛 放大光明 朗如日月照乾坤
利益諸眾生 普燭幽冥 災消福駢臻

太上皈命禮玉華散影天尊 (三稱三拜)

金光神咒

天地玄宗 萬氣本根 廣修億劫 證吾神通
三界內外 惟吾獨尊 體有金光 覆映吾身
視之不見 聽之不聞 包羅天地 養育群生
誦持萬遍 身有光明 三界侍衛 五帝司迎
萬神朝禮 役使雷霆 鬼妖喪膽 精怪亡形
內有霹靂 雷神隱名 洞慧交徹 五氣騰騰
金光速現 覆護真人 急急如律令

開心神咒

九天大帝 身披白衣 日月照曜 乾坤幹隨

有能敬者 聰明如斯 黃老丹元 與念合宜
五神衛守 八聖護持 誦之不輟 萬神赴機
我司大化 光曜生輝 心開茅塞 祛鈍除迷
誦之萬遍 文治瓊瑰 詞源浩浩 筆陣風馳
九天開化 萬章洞微 元皇上令 勿稽勿違
急急如元皇上帝律令敕

淨身神咒

諸我不淨 不淨起我 無淨無我 諸我自淨
以日洗心 以月鍊形 仙人扶起 玉女隨形
二十八宿 與吾合形 千邪萬穢 逐水而清

靈寶天尊 安慰身形 弟子魂魄 五臟玄冥
青龍白虎 隊仗紛紜 朱雀玄武 侍衛我真

淨口神咒

皇君皇君 吐氣成雲 令吾淨口 持念真文
丹朱口神 吐穢除芬 舌神正倫 通命養神
羅千齒神 祛邪衛真 喉神虎賁 氣神引津
心神丹元 令我通真 思神煉液 道氣長存

淨心神咒

太上臺星 應變無停 驅邪縛魅 保命護身
智慧明淨 心神安寧 三魂永久 魄無喪傾

安土地神咒

元始安鎮 普告萬靈 嶽瀆真官 土地祇靈
左社右稷 不得妄驚 回向正道 內外澄清
各安方位 備守宮庭 太上有命 搜捕邪精
護法神王 保衛誦經 皈依大道 元亨利貞

請社令神咒

功曹土地 神之最靈 通天達地 出幽入冥
為吾關奏 不得留停 有功之日 名書上清

發爐讚

道由心學 心假香傳 香熱玉爐 心存帝前

真靈下盼 仙旆臨軒 令臣關告 徑達九天
所祈所願 咸錫如言 伏以 寂然不動 感
而遂通 太音聲希 叩之則應 恭焚道德真
香 虔誠上啟供養

至心皈命禮

玉清聖境 清微天宮 鬱羅蕭臺之中 森羅淨
泓之上 現有為之梵相 具無極之神通 敷
演真玄 破無有色空之礙 拯提趣類 絕智
愚高下之分 妙用難窺 靈機罔測
大悲大願 大聖大慈

無量度人元始大天尊

至心皈命禮

上清真境 禹餘天宮 紫微瓊臺之中 玄都玉
京之上 接元始虛皇之統繫 超西那玉國之
根苗 入黍米珠 盡挹真玄之精粹 在香林
苑 屢談秘要之荃蹄 妙德難思 神通莫擬
大悲大願 大聖大慈
無量度人靈寶大天尊

至心皈命禮

太清仙境 大赤天宮 巍巍金闕之高 渺渺重

霄之上 降生於無量數劫 說法於萬二千天
五千秘言 融三才之妙道 八十餘度 接六
趣之眾生 聖德崇高 玄功廣博

大悲大願 大聖大慈
無量度人道德大天尊

志心皈命禮

太上彌羅無上天 妙有玄真境 渺渺紫金闕
太微玉清宮 無極無上聖 廓落發光明 寂
寂浩無蹤 玄範總十方 湛寂真常道 恢漠
大神通 至靈至聖 至上至尊

玄穹高上帝玉皇大天尊

至心皈命禮

紫微宸極 勾陳天宮 九光寶苑之中 五氣玄
都之上 體元皇而佐司玄化 總兩極而共理
三才 主持兵革之權衡 廣推大德 統御星
辰之躔次 毋失常經 上象巍峨 真元恢漠
大悲大願 大聖大慈
勾陳上宮天皇大帝

志心皈命禮

大羅天闕 紫微星宮 尊居北極之高 位正中

天之上 佛號金輪熾盛 道稱玉斗玄尊 璇璣玉衡齊七政 總天經地緯 日月星宿約四時 行黃道紫垣 萬象宗師 諸天統御
大悲大願 大聖大慈
萬星教主無極元皇中天紫微北極大帝

志心皈命禮

九華玉闕 七寶皇房 承天稟命之期 主陰執陽之柄 道推尊而含弘光大 德敷蓄於柔順利貞 效法昊天 根本育坤元之美 流形品物 生成施母道之仁 嶽瀆是依 山川咸仗

大悲大願 大聖大慈

承天效法后土皇地祇

志心皈命禮

高上神霄府 凝神煥照宮 會元始祿氣以分真 應妙道虛無而開化 位乎九霄之上 統理諸天 總乎十極之中 宰制萬化 宣金符而垂光濟苦 施惠澤而覆育兆民 恩溥乾元 仁敷浩劫 大悲大願 大聖大慈

玉清真王南極長生大帝統天元聖天尊

志心皈命禮

青華長樂界 東極妙嚴宮 七寶芳穠林 九色
蓮花座 萬真環拱內 百億瑞光中 玉清靈
寶尊 應化玄元始 號劫垂慈濟 大千甘露
門 妙道真身 紫金瑞相 隨機赴感 誓願
無邊 大聖大慈 大悲大願 十方化號 普
度眾生億億劫中 度人無量 尋聲赴感
太乙救苦天尊青玄九陽上帝

志心皈命禮

混元六天 傳法教主 修真悟道 濟度群迷
普為眾生消除災障 八十二化 三教祖師

大慈大悲 救苦救難 三元都總管 九天遊
奕使 左天罡北極 右垣大將軍 鎮天助順
真武靈應 福德衍慶 仁慈正烈 協運真君
治世福神 玉虛師相

玄天上帝金闕化身蕩魔天尊

志心皈命禮

北斗玄冥 七元解厄善通靈 開明三景 迴度
五常 五行共稟 七政同科 為造化之樞機
作人神之主宰 宣威三界 判人間善惡之期
司陰府是非之目 能解一切罪 攝伏諸魔精

大悲大願 大聖大慈

北斗九皇大帝解厄賜福天尊

志心皈命禮

德本注生 職司延壽 移星轉斗於天上 化凶

作吉於人間 稟火德而養丹臺 功成九轉

掌離宮以住南極 位蓋三千 執瑤池之聚仙

旗 領金闕之救劫旨 同設宣講 共議團圓

大悲大願 大聖大慈

南斗壽星大帝延壽益算天尊

志心皈命禮

不驕樂境 玉真慶宮 現九十八化之行藏 顯

億千萬種之神異 飛鸞開化於在在 如意救

劫於生生 至孝至仁 功存乎儒釋道教 不

驕不樂 職盡乎天地水官 功德難量 威靈

莫測 大悲大願 大聖大慈 九天輔元 開

化主宰 司祿職貢舉真君 七曲靈應 保德

宏仁大帝談經演教消劫行化更生永命天尊

志心皈命禮

太上神威 英文雄武 精忠大義 高潔清廉

運協皇圖 德崇演正 掌儒釋道三教之權

管天地人三才之柄 上司三十六天星辰雲漢
下轄七十二地冥壘幽艷 秉注生功德 延壽
丹書 執定死罪過 奪命黑籍 考察諸佛諸
神 監制群仙群職 高證妙果 無量度人
貞元顯應 大悲大願 大聖大慈
伏魔大帝關聖帝君昭明翊漢天尊

志心皈命禮

唐朝秀士 蓬萊上仙 降生於八月之天 證道
於群仙之會 醉岳陽而感應 設箕沙以著靈
救劫好生 垂書濟世 鍊金丹以活民命 功

著千秋 請玉旨而設講臺 澤及萬姓 身披
乾坤道袍 手執金玉如意 神通廣大 聖德
崇高 大悲大願 大聖大慈
正一玉虛內相孚佑帝君度人天尊

志心皈命禮

羅漢倒裝 淨慈坐化 動中尋靜 菩提果證三
千 妙裏藏玄 如來龕成俄頃 處處俱關心
印 時時悉寓禪機 西湖留蹤 南黔顯化
一片婆心 消浩劫幾番 慈舟度眾生 善為
調元 顯應之功不朽 切於勸世 慈悲之念

常存 暗引金針 鴛鴦吐秀 普降時雨 草
木回春 大開普濟之舟 廣施群黎之澤 成
佛妙果 證道仙階 大悲大願 大聖大慈
救劫無量古佛道濟禪師調元普濟天尊

志心皈命禮

興周滅紂 輔正除邪 三謁碧遊宮中 首朝黃
金闕內 輔三清之上座 開萬代之玄功 清
靜不染紅塵 道則高矣 虛無常傳白簡 功
何偉乎 時值下元 領旨救劫 運際末世
飛鸞垂書 闡秘密於先天 啟愚昧於後學

不生不滅 無我無人 大悲大願 大聖大慈

玉清輔教廣成仙師

志心皈命禮

養性歸真 修心證道 稟乾坤之正氣 得天地
之精靈 太極未分 玄機即測 道為無上
形具有形之先 法本有原 為歸無為之化
陰陽合德 水火結形 大悲大願 大聖大慈
校正尊經赤精仙師

志心皈命禮

五行渾合 二氣結成 兼秉乾坤之靈 獨得陰

陽之正 或有相 或無相 太虛俱空 若有
倫 若無倫 大化莫擬 說法於三千世界
成道於億萬斯年 遍救人民 敬領玉清之敕
命 同回劫運 欽承金闕之綸音 廣大慈悲
普開方便 大悲大願 大聖大慈
龍漢正道雲中仙師

志心皈命禮

先天大道 無上法師 取水火而養丹田 鍊陰
陽以歸玄苑 功成九轉 朵朵蓮花齊開 果
證三千 篇篇貝葉胥著 妙手拈來皆是道

盡心會處即通靈 闡道學之蹄荃 悟仙機之
玄妙 神通莫比 靈應無方
大悲大願 大聖大慈
清靜自然玄中大法仙師

志心皈命禮

隱居下僚 功成上品 識道祖於函谷 辭爵位
於朝廷 心悟五千之言 名著丹籍 身逃億
萬之劫 意總紅塵 妙法得聞 仙緣有分
大道獲遇 俗慮胥融 瑤池特展聚仙旗 金
闕因命挽劫運 慈悲有在 智慧無方

大悲大願 大聖大慈
道德流傳尹熹仙師

志心皈命禮

斗壇演教 桂殿司徒 生大定而闡揚黔邦 編
廣化而顯應番土 祈禳心懺 在在令人皈依
參閱善書 般般為世勸戒 六時行道之主教
諸生習錄之宗師 大洞會心 上乘證果
大悲大願 大聖大慈
桂香輔殿司圖金仙贊化真官

志心皈命禮

先天主將 無上慈王 提衡三界神祇 糾察人
間善惡 行風走火 落十方外道之魂 治病
驅邪 鑒凡民一誠之懇 領三清法旨以蕩除
措九地生民於衽席 為瞋為怒 祇求奸慝回
心 示烈示嚴 總屬慈仁莫已 洪恩際地
大德同天 大悲大願 大聖大慈
雷霆統制 萬法主宰 神威豁落
保世救民雷聲普化天尊

志心皈命禮

先天主將一氣神君 都天糾罰大靈官 三界無

私猛烈將 金睛朱髮 號三五火車雷公鳳嘴
銀牙 統百萬貔貅神將 飛騰雲霧 號令雷
霆降雨開晴 驅邪治病觀過錯 於一十二年
受命玉帝積功勳 於百千萬劫誓佐祖師 至
剛至勇 濟死濟生 方方闡教處處開壇 豁
落猛吏三五火車 大悲大 大聖大慈
監壇大靈官王天君 太乙雷聲應化天尊

志心皈命禮

雷部尊神 玉樞上將 銀牙鳳嘴上三天 青面
藍身入九地 超屬風火 掃十方外道之妖邪

手執銅錘 驅三界不祥之鬼祟 名留顯應
功贊調元 督勸化之講臺 挽沉溺之世道
讚莫能盡 功實難名

大悲大願 大聖大慈

調元上將辛大天君十方顯應天尊

志心皈命禮

湖海寄跡 正直居心 卜宅於印山 著名於潭
水 施棺木免屍骸之暴露 作橋樑濟人民之
沉淪 恤寡矜孤 救難濟急 生前有直道之
譽 死後急上仙之階 造調元以成真 開顯

應而證果 南宮受鍊 丹籍書名

大悲大願 大聖大慈

三清三境護法真人

志心皈命禮

正直不阿 孝友無愧 守忠厚之遺訓 慕詩禮

之良規 喜聞善言 宣讀頻開廣化 敬事神

道 團圓大鍊金丹 歷數劫始歸仙班 當下

元方證正道 遭逢不偶 三千年之奇遇 非

常際會有時 四五載之大功弗淺 龍顏屢候

綸音恒頒 為註清微之經 因成無上之道

位居至極 名列上仙

大悲大願 大聖大慈

玉清聖境 司經真人

志心皈命禮

派演雙井 名列三清 厚德開累葉之家聲 忠

樸守祖宗之遺緒 謙謙君子 藹藹吉人 值

貧富而重詩書 處富貴而好禮義 生享清福

死列仙階 皆緣訓子之有方 所以證道於不

滅 金闕頒詔玉旨特封

大悲大願 大聖大慈

上清真境司經真人

志心皈命禮

生居吳會 死鎮黔邦 性質本屬溫和 言行實

為謙厚 鑒調元作無量之寶筏 開顯應樹不

世之奇勳 始陞龍泉 復救湄水 曾費千般

苦口 以訓及門 屢體一片婆心 而挽劫運

德則大矣 民皆仰之

大悲大願 大聖大慈

太清仙境司經真人

志心皈命禮

降生江右 遷移黔中 得賢胤以紹書香 施時

雨而回世運 金針大度 刺醒無數昏迷 寶

鏡高懸 照徹有生肝膽 始司府尹之任 顯

應無窮 繼列天仙之班 調元有驗 紅塵之

緣未斷 丹天之鍊非誣 德播無疆 功垂不

朽 大悲大願 大聖大慈

參閱證果黃林真人

志心皈命禮

顯應證道 調元贊功 墮塵於天順之初 鍊神

於身謝之後 輔助善果 後人可蓋前人之愆

挽回天心 陽界實貽陰界之福 大功既就
超及九玄 浩劫能消 度諸七祖 講樓恒伴
以勸世 沙筆屢候而回春 得遇奇緣 自歸
正道 大悲大願 大聖大慈

南宮脫化妙林真人

志心皈命禮

黔邦壯士 清邑名儒 比禮樂以就功名 談經
史而起愚昧 有典有則 孝友敦和睦之風
無黨無偏 詩書遺勤苦之教 守前人之矩矱
為先正之典型 祖德流芳 安居凱里 苗民

逆命 避難勻陽 家人離有離別之傷 後嗣
實獲救援之幸 揮毫如意 助善成功
大悲大願 乃武乃文
輔翼正法普度真君

志心皈命禮

文昌紀錄 桂籍仙官 假詩酒以娛情 培桃李
而悟道 一門好善 處處喜逢春風 廿載啟
蒙 人人欣沾時雨 身居城市 心寄煙霞
惡趨炎以就逢迎 守貧而安淡泊 書中尋理
常拾字以遂珍重之懷 妙處求玄 恒救難而

廣慈悲之念 先型可則 後世克昌

大悲大願 大聖大慈
靈寶消劫 濟世真君

志心皈命禮

功佐普化 力勸同緣 曾贊金針以繡鴛鴦 屢
吹玉笛而引鸞鳳 詩書傳家聲以不墜 規矩
守祖武以克繩 忠厚居心 孝友遺後 時當
末劫 欲究聖學之淵源 運值下元 思參神
化之旨趣 玉虛簡命 金闕綸音

大悲大願 大聖大慈

上清無為清靜真人

志心皈命禮

先天無上道 托塔大天王 輔金闕以降魔 佐
玉皇而除祟 位在三十六天之上 功超億千
萬劫之中 道法靡窮 神威難擬 奉上帝之
敕旨 助內相之奇功 護衛尊經 巡查上界
大悲大願 至聖至神
大梵天王托塔大法天尊

志心皈命禮

聖門勇士 泗水英賢 欣然動浮海之思 行

行如副升堂之望 雄冠劍佩 英氣畢露於一
堂 絕糧問津 大道常困於列國 春秋配享
唐宋追封 超仙佛以為尊 同天地而不朽
延康浩劫 三教同悲 清微尊經 諸天共讚
奉聖旨以臨壇 護玉虛而闡教 神功廣播
惠澤旁敷

大悲大願 大聖大慈

先賢仲氏夫子輔儒衛道天尊

志心皈命禮

啟請騫林夏元帥 東宮護法上將軍 手執鋼鞭

降鬼崇 身披金甲顯威靈 或歸雷部巡世界
時領符命入幽冥 十八獄中常救苦 釋放囚
圉諸罪魂 降魔護道功勞大 回生起死救良
民 若有不順吾道者 先斬後奏報知聞 尊
經衛法奉敕令 特鎮南方斬妖精
微臣有請望來臨 大賜雷威加擁護

志心皈命禮

啟請桂宮主帥將 催生保產高將軍 粉面銀盃
束玉帶 少年英武捕邪精 左提鐵棒如雲掃
右捧麟兒降善門 一切邪魔並外道 收捉纖

毫不容情 天醫輔佐功彌大 飛符治病頃刻
臨 曾奉元皇親敕令 護衛玉虛註尊經 臣
今有請望來臨 大賜神威加擁護

志心皈命禮

啟請北方捉邪將 風輪盪鬼周將軍 面如藍靛
硃砂髮 銀牙巨目捕妖精 兩隻金鞭提在手
音聲響處如雷霆 三界魔王俱喪膽 諸般鬼
崇盡滅形 曾受玄帝親法旨 飛鸞顯應衛尊
經 臣今啟請降來臨 大賜神威加擁護

志心皈命禮

啟請協天伏魔將 持刃周帥大將軍 黑面虬鬚
如環眼 英雄忠義蓋三分 時隨伴駕朝金闕
每借飛鸞顯威靈 救劫侍帝心力苦 雲程日
夜不留停 註解尊經承敕命 鎮守西南除妖
氛 臣今有請望來臨 大賜神威加擁護

志心皈命禮

啟請上元唐元帥 紫微首將冠三天 寶劍揮時
群魔畏 邪祟有誰敢近前 三十六罡稱上將
常降福祉在人間 上天入地頃刻際 糾功察
過本無偏 上界時時衛正道 統領天兵萬萬

千 內相解經闡玄妙 西方鎮攝最森嚴 臣
今啟請望來臨 大賜雷威加擁護

至心皈命禮

啟請清虛葛元帥 中元二品大將軍 龍眉驢唇
並豹眼 皂袍鐵棒鬼神驚 白都宮裏時侍衛
統領三千眾陰兵 鬼祟妖邪同外道 搜捕捉
縛入幽冥 治病驅邪如雲捲 飛鸞降筆救黎
民 東北護道功勞大 喜動玉皇與三清 敕
令冥邦拷鬼魅 救劫處處護生靈 臣今啟請
望來臨 大賜神威加擁護

志心皈命禮

啟請洞陰周元帥 水府浪苑顯神通 北魁玄範
泉曲鬼 聞名喪膽滅形蹤 巨口朱髮銀牙露
鐵盔鐵甲逞威風 手執戈矛巡下界 蝦兵蟹
將排西東 江湖淮濟捉水鬼 浪靜波平樹奇
功 顯應西北曾勞駕 尊經護法氣豪雄 臣
今啟請望來臨 大賜神威加擁護

志心皈命禮

三清眾聖 四府萬靈 護法無數神祇 衛經有
感聖眾 五方五帝之侶 四隅四季之神 二

十四氣 七十二候 水火金木土 五行主者
乾坎艮震 八卦神君 城隍社令 里域真官
（某）宅香火 三教福神 斗（法）壇啟教
列位師尊 （接禮師）恭望洪慈 鸞輿早降

讚 舉

太上說法時 琳琅響玉音 道高龍虎伏 德重
鬼神欽 群魔皆拱手 三界共傾心 臣今虔
諷誦 功德等上清

太上皈命禮開函演奧天尊（三稱三拜）

香煙遍法界

萬聖齊降臨 俯伏金階下 禮拜表真誠

夫此香者 靈檀馥郁 瑞氣氤氲 頃刻遍滿
十方 須臾感通三界 渾結禎祥之字 普迓
清靜之真 稽首眾聖前 心香前焚獻

蠟炬焰輝煌 幽微共睹光 照徹三界內諸

聖降壇場

夫此燭者光同日月 彩耀乾坤 華房玄苑之
間 琅琅炳炳 丹臺紫府之內 色色空空
金闕放大光明 玉京鑒諸功德 稽首眾真前
寶炬虔呈獻

心花疊疊冠群英 錦繡馨香瑞色凝 無根之
樹誰能識

元始天王道自成 花光爛熳 花色芬芳 花隨
四季吐奇葩 花放滿園爭春色 蓮花朵朵
須知火裡栽培 性花層層 當職鼎中灌溉
今逢其會意花開 敢向金闕而上獻
一盞明燈分九卮 乾坤大地燭無遺 何人度
遍三千界 大道流傳已有時 燈光遠照 燈
蕊頻開 燈火朗徹於昏衢 燈座輝煌於長夜
燈影灼灼 遙映三界十方 燈焰重重 普供

千真萬聖 茲點不夜之明燈 願燭無遺之法界
華池神水本先天 灌溉勿忘功自全 子午相
沖須既濟 河車搬運入丹田 臣聞水者 生
居五行之先 位列八卦之次 德雖至柔 能
載慈舟而濟世 性即就下 可納寶鼎以滋生
欲滌身心之愆尤 當賴清靜之神水 道果熟
時功已成 陰陽合德見天根 栽培歷數三千
劫 脩取離宮獻玉京
臣聞果者 瑤池獻瑞 橘井流香 賴主人栽
培之功 仗園丁灌溉之力 猿猴欲竊 防護

彌周 盜賊思偷 衛守愈固 三千年成熟之
候 二六時供獻之辰 敢摘取以陳天階 希
恩惠而降凡宇

茗茶獻金鐺 瑞氣滿壇場 消除煩惱障 皈
命禮法王 伏聞茶者 古稱瑞草 俗號靈芽
清風生七碗之甌 幽香馥滿座之客 敬獻黃
金闕內 虔陳白玉京中 恭望

天慈 俯垂納受 火齋水泉麴蘖香 造成酒醴
味非常 凡人欲赴群仙宴 須獻金卮禮

玉皇

伏聞酒者 金瓶撲鼻玉翠流香 岳陽醉無上
之真仙 淨慈飲不滅之佛子 瑤池頻開大會
金闕屢賜瓊漿 凡情藉此以投誠 聖真臨軒
而鑒惻 恭望

天慈 俯垂納受 天地精英萃玉華 奇珍異寶
眾爭誇 不貪不吝方為貴 敬獻瑤臺種善芽
竊以海錯山珍 悉稟乾坤之氣 物華天寶
俱含宇宙之靈 功鎮山河 光燦日月 假陰
陽之造化 借水火以陶鎔 恭望

天慈 允納素惻 玉清留下一蒼胡 太極結成

黍米珠 靜裏包涵無數義 先天先地實虛無
竊以合浦流輝 燦爛得天地之靈氣 芳函散
彩 精華現宇宙之奇文 索還於鄭市之中
採取於龍頷之下 精光奪目 雅色宜人 恭
望

天慈 允納素悃 靈文蘊奧本先天 太極虛涵
大道全 三十六符能測透 玄玄妙妙玄玄
恭維鴻鈞闡奧 無極渾含乎陰陽 元始談經
黍米包羅乎天地 金科玉匱之符篆 實寓天
機 清微靈寶之秘文 原藏大道 今皈依而

上獻 願頂禮以不忘 八卦霓裳萬象包 無
無有有靜中醮 天開景運皇圖固 補綴乾坤
不憚勞 恭維金針刺繡 雲衣成功 頻添錦
上之花 虛涵玄中之妙 纖纖女手 織就絢
爛之文 楚楚衣裳 包羅乾坤之義 今叩金
闕而敬陳 惟祈

天顏之洞鑒 臣今東向請 願聖共臨軒 十方
三界眾 頃刻降瑤壇 以今啟請行道 已遂
周隆 謹具請經疏文 恭為宣讀 三天門下
拜進疏文一函 上詣

三清司經宮 呈進臣等回壇 同聲讚詠 道從
太極鎮玄綱 道判三才列五常 經乃鍊金成
鳳篆 經能揉玉寫龍章 師乘白鶴威神奕
師駕青牛意氣揚 寶鼎芬芳陳寶座 寶香渺
渺透穹蒼

大聖三清應化天尊（三稱三拜）

所謂道 天上金科傳宇宙 雲端捧出玉函來
尊經談演功無量 大道頻敷景色開 正法得
遇 讚莫能窮 恭對瑤臺 皈依頂禮
第一皈依

無上道寶 玉清聖境 元始大天尊

第二皈依

無上經寶 上清真境 靈寶大天尊

第三皈依

無上師寶 太清仙境 降生大天尊

皈依已竟 謹當發願

一願乾坤交泰 二願邦國安甯 三願皇王有
道 四願五穀豐盈 五願刀兵不起 六願人
物咸亨 七願劫難消散 八願水火不興 九
願求道得遇 十願名列仙真 十一願百靈拱

服 十二願萬物沾恩 發願已周 應當禮謝

至心禮謝

三清應化大天尊

金闕玉皇大天尊

十方無極天尊

三清護法天尊

四府眾位神祇

經筵有感真仙 恭望

洪慈 鑒此微忱 禮請功德 上奉群真 諷演

誥章 普安神位

至心皈命禮

惟三聖人 乃一太極 昔受浩劫家之命 鼎膺

無量品之褒 紫微清虛洞陰 總領功過 賜

福赦解厄 溥濟存亡 道冠諸天 恩覃三界

大悲大願 大聖大慈

三元三品三官大帝三宮九府三百六十應感天尊

向來啟經法事 已合周完 楮財大會 恭對

寶壇 用憑火化

至心稱念

大聖談經演教天尊

大聖開函演奧天尊 不可思議功德

太上無極大道三十六部尊經啟請科儀 竟

太上無極大道三十六部尊經

上香讚

香焚寶鼎 氣達三清 人神合一 謁瑤宮
隨處顯神通 蘭篆凌空 萬聖會丹衷。

太上皈命禮三清三境大天尊（三稱三拜）

上燭讚

初燃燭炬 放大光明 靈心不昧 共澄清
塵念不重萌 掃蕩凡情 最上大丹成

太上皈命禮慈光普照大天尊（三稱三拜）

開經讚

太極分高厚 清輕上屬天
人能修至道 身乃作金仙
三清遺正教 度人無量天
丹臺開寶笈 真口與流傳

太上皈命禮十方感應大天尊（三稱三拜）

三清總聖誥 志心皈命禮

道寶 經寶 師寶 玉清 上清 太清 一氣
流行 三尊應化 涵光默默 不言而運行四
時 正色空空 無極而化生三界 大羅天上
金闕宮中 虛無自然三清三境三寶大天尊
志心皈命禮玉清聖境 清微天宮 鬱羅蕭臺

之中 森羅淨泓之上 現有為之梵相 具無
極之神通 敷演真玄 破無有色空之礙 拯
提趣類 絕智愚高下之分 妙用難窺 靈機

罔測 大悲大願 大聖大慈

無量度人元始大天尊

無量度人靈寶大天尊

無量度人道德大天尊